

04 MAY 1996

PM DEKLAMASI SAJAK SENDIRI PADA MALAM PUISI UTUSAN

KUALA LUMPUR, 4 Mei (Bernama) -- Perdana Menteri Datuk Seri Dr Mahathir Mohamad malam ini mendeklamasikan sebuah sajak karyanya sendiri pada Malam Puisi Utusan IV, di Pusat Penerangan Pelancongan Malaysia (Matic), di sini.

Dengan air mata berlinangan di pipinya, Dr Mahathir menyampaikan sajak bertajuk "Perjuangan Yang Belum Selesai" mengenai bangsa Melayu yang dijajah pada zaman sebelum Merdeka.

Malam Puisi kali keempat itu diadakan sempena ulangtahun ke-50 UMNO. Ia anjuran akhbar Utusan Malaysia dengan kerjasama Kementerian Kesenian, Kebudayaan dan Pelancongan dan Dewan Bahasa dan Pustaka.

Antara yang menyampaikan sajak malam ini ialah Sasterawan Negara Datuk Noordin Hassan, pelakon Haliza Misbun dan Aida Rahim serta penyanyi M.Nasir.

Selain itu satu pementasan teater bertajuk "Anugerah" arahan Rosminah Tahir turut dipersembahkan dengan barisan pelakon Rosyam Nor, Raja Azura, Haliza Misbun dan Mubarak Majid.

Yang turut hadir ialah Menteri Pembangunan Luar Bandar Datuk Annuar Musa. -- BERNAMA

WE NAK

Berikut ialah sajak yang dikarya Perdana Menteri Datuk Seri Dr Mahathir Mohamad, yang disampaikan beliau pada Malam Puisi Utusan IV, di Pusat Penerangan Pelancongan Malaysia (MATIC) di sini, malam ini:

PERJUANGAN YANG BELUM SELESAI

Sesungguhnya
tidak ada yang lebih menyayat
dari melihat bangsaku dijajah
Tidak ada yang lebih menyedihkan
dari membiar bangsa ku dihina

Air mata tiada ertinya
sejarah silam tiada maknanya
sekiranya bangsa tercinta terpinggir
dipersenda dan dilupakan

Bukan kecil langkah wira bangsa
para pejuang kemerdekaan
bagi menegakkan kemuliaan
dari darjat bangsa
Selangkah bererti mara
mengharung sejuta dugaan

Biarkan bertatih
asalkan langkah itu yakin dan cermat
bagi memastikan negara merdeka
dan bangsa terpelihara
Air mata sengsara
mengiringi setiap langkah bapa-bapa kita

Tugas kita bukan kecil

kerana mengisi kemerdekaan,
rupanya lebih sukar dari bermandi keringat dan darah menuntutnya

Lagi pula, apalah ertinya kemerdekaan
kalau bangsaku asyik mengia dan menidakkan,
mengangguk dan membenarkan,
kerana sekalipun bangganya negara
kerana makmur dan mewahnya,
bangsaku masih melata
dan meminta-minta di negaranya sendiri

Bukan kecil tugas kita
meneruskan perjuangan kemerdekaan kita
kerana rupanya
selain memerdekakan,
mengisi kemerdekaan itu jauh lebih sengsara

Bangsa bukan kecil hati dan jiwanya
Bukankah sejak zaman berzaman
mereka menjadi pelaut, pengembara
malah penakluk terkemuka?
Bukankah mereka sudah mengembang sayap,
menjadi pedagang dan peniaga
selain menjadi ulama dan ilmuan terbilang?

Bukankah bangsaku pernah mengharung samudera
menjajah dunia yang tak dikenal
Bukankah mereka pernah menjadi wira serantau
yang tidak mengenal erti takut dan kematian?

Di manakah silapnya
hingga bangsaku merasa begitu kecil dan rendah diri?
Apakah angkara penjajahan?
Lalu bangsaku mulai melupakan kegemilangan silam
dan sejarah gemilang membina empayar?

Tugas kita belum selesai rupanya
bagi memartabat dan memuliakan bangsa
kerana hanya bangsa yang berjaya
akan sentiasa dihormati

Rupanya masih jauh dan berliku jalan kita
bukan sekadar memerdeka dan mengisinya
tetapi mengangkat darjat dan kemuliaan
buat selama-lamanya

Hari ini, jalan ini,
pasti semakin berliku
kerana masa depan
belum tentu menjanjikan syurga
bagi mereka yang lemah dan mudah kecewa

Perjuangan kita belum selesai
kerana hanya yang cekal dan tabah
dapat membina mercu tanda
bangsanya yang berjaya

-- BERNAMA
SJA NAK